

Uorden disciplinar pil consorzi da scola per las scolas primaras e la scoletta dallas vischnauncas da Vuorz ed Andiastr

A) *En general*

Art. 1 Intent

Igl uorden disciplinar vala per tut las scolaras e tut ils scolars dallas scolas dil consorzi da scola per las scolas primaras e la scoletta dallas vischnauncas da Vuorz ed Andiastr.

Ensem cun igl uorden da scola segirescha el in menaschi da scola senza disturbi. El reglescha las cumpetenzas dallas autoritads da scola e dils scolars sco era la procedura en cass da surpassaments dils scolars envers la disciplina da scola.

Art. 2 Instrucziun, absenzas, congedis

Ils temps da scola ein d'observar.

Per absenzas, congedis ed extradadas dalla scola avon temps valan las prescripziuns digl uorden da scola e dalla lescha da scola dil cantun.

B) *Disciplina en scola*

Art. 3 Reglas da secuntener

Scolars e scolasts han da secuntener vicendeivlamein a moda discreta e toleranta ed han cunzun da tralasar remarcatas offendentas.

Ils scolars sedeportan andantamein denter els, envers scolasts, autoritads da scola e persunal da scola. Las directivas dils scolasts, dallas autoritads da scola e dil persunal da scola ein d'observar. Els han d'evitar tut quei che disturba il menaschi da scola.

Duront ils meins da scola dueien ils affons esser sut la surveglanza dils geniturs sunter las 21.00 uras.

Art. 4 Localitads, indrezs, urdeins

Ils scolars han d'haver quitau dils indrezs en las localitads e sin ils areals da scola sco era dils urdeins e dil material da scola.

Art. 5 Products da consum, da luxus e mieds toxicogens

Mieds che donnegian la sanadad sco il fimar, il consum da bibrondas alcoholicas e prender drogas ei scumandau strictamein als scolars.

C) *Puniziuns disciplinaras, cumpetenzas, procedura*

Art. 6 Cass disciplinars, puniziuns disciplinaras

Surpassaments viers igl uorden disciplinar vegnan castigai cun reprimandas, lavurs per castitg, arrest ni cun ina lavur speciala sut surveglanza. Duront igl arrest sto il scolar vegnir occupaus cun ina lavur significativa.

Il cuoz maximal pigl arrest e per las lavurs specialas munta a 4 mezs gis.

Art. 7 Cumpetenzas

Ils scolasts san ordinar ina reprimanda a bucca ni a scret, lavurs per castitg ed in arrest tochen ad in miez gi.

Art. 8 Constatar il causal, udida da dretg

Specia e circumstanziass dil surpassament disciplinar ein da sclarir. Il scolar ei da tedlar. En cass nua ch'in arrest survarga in miez gi ni ina lavur speciala sut survegionza stattan en damonda, eis ei da tedlar ils geniturs resp. lur representants avon che prender ina decisiun. La decisiun ei da comunicar ad els a scret cun aschuntar ils motivs.

Art. 9 Recuors

Encunter decisiuns da castitgs disciplinars tras ils scolasts sa vegnir fatg recuors al cussegl da scola. Quel decida definitivamein.

Encunter decisiuns ch'il cussegl da scola pren sco emprema istanza sa vegnir fatg recuors al departement d'educaziun.

D) Disposiziuns finalas

Art. 10 Vigur

Quest uorden disciplinar va en vigur cun l'approbaziun entras la radunonza communal da Vuorz dils 25.04.2003 e dalla radunonza communal d'Andiast dils 23.05.2003 e cun la ratificaziun entras la Regenza dil cantun Grischun.

En quest uorden disciplinar vala la noziun scolast era per scolasta, la noziun scolar era per scolara.

Per las vischnauncas politicas:

Il president communal Vuorz:

Il canzlist communal Vuorz:

Il president communal Andiastr:

Il canzlist communal Andiastr:

Per il cussegl da scola Vuorz / Andiastr:

Il / la president/a:

Igl / l'actuar/a:
